


I NYOMAN SUDARMA,

TGL. 3 - 11 - 1990.

AWIG – AWIG BANJAR ADAT PENGAJI



PENGAJI
1989

AWIG-AWIG BANJAR ADAT PENGAJI

Krama Banjar Adat Pengaji Wewidangan Désa Malinggih Kelod, Kecamatan Payangan, Kabupatén Gianyar, duk Parumannya ring rahina Redité wara umanis titi tang/pang ping molas ça kapat, Içaka 1911 tanggal Masehi 15 Oktober 1989 gilik seguluk saha susrusa ngemanggehang Awig-Awig kadi sor.

SARA CITTA

Banjare mula wantah pawakan pasayuban krama Banjar rawuhing kulawarga pawongannya. Manut dresta Banjar kenggehang Bhuwana Agung, Pawongannya sowang-sowang pinaka Bhuwana Alit. Adung patemuan Bhuwanané kalih larapan çanta-jagathita, sinanggeh murddhaning prayojana pangriptaning Awig-Awig.

Sotaning Bhuana Agung, Banjar wantah pawakan "BHUWANA-MAURIP" Jangkep saha Tri-Hite-karananya luwiri:

- (1) PARAHYANGAN, sehanan kahyangan panyiwihan Banjar, genah ngarcana Hyang, maka Atman Banjar.
- (2) PALEMAHAN, tanah kekuwuban saha dagingnya sinanggeh Angga-sarira tawulan Banjar.
- (3) PAWONGAN, warga ~~Pawong~~ sami, pawakan Tri Kaya, awanan Banjar Siddha molah memprawreti.

Sajaba dresta inucap, pamekas Pancasila, Undang-Undang Dasar 1945, miwah sehanan Peraturan-Peraturan Negara Kesatuan Republik Indonesia ne tan maren manggeh kainggilang, tan wanang kelempanasin antuk Awig-Awig puniki.

SARGA I

ARAN LAN PALEMAHAN

Pawos 1.

1. Banjar Adat puniki mewaste BANJAR ADAT PENGAJI.
2. Jebar kekuwub wewidangannya, mewates nyatur desa :
 - (1) Sisih waten ring Banjar Sema, lan Subak Babakan
 - (2) Sisih Kidul ring Subak Kembang Kuning
 - (3) Sisih Kulon ring Br Paneca, lan Br Karang Suwung
 - (4) Sisih Lor Ring Desa Melingih

Pamos 2.

Kekuwub wewidangan Banjare, manut dresta luwire:

1. Pepupulan karang pumahan, sinanggeh palemahan Banjar Pekraman.
2. Sawah miwah tegal ring kekuwub wewidangan Banjar sejabaning Palemahan Banjar Pekraman manggeh telajakan Banjar.

Pamos 3.

1. Awig-Awig, perarem-perarem miwah sehananing pasuaran banjar manggeh kajejerang ring kekuwub wewidangan Banjar
2. Awig-Awig miwah Perarem-Perarem Subak ring telajakan Banjar, tan maren manggeh keinggilang.

SARGA II
DASAR LAN TETUJON

Pamos 4.

Banjar Adat Pengaji puniki ngemanggehang dasar:

1. Tri Hita Karana manut tatwaning Bhuwana Agung.
2. Pancasila kadi munggah ring pembukaan Undang-Undang Dasar 1945.

Pamos 5.

Luwir tetujon Banjar Adat Pengaji inggih punika:

- (1) Mikukuh miwah ngajegang Sang Hyang Agama
- (2) Ngajegang tata prewretiné megama
- (3) Ngajegang kasukertan Banjar saha pawongannya sami sekala niskala.
- (4) Ngajegang tata sangaskaraning pawongan, pamekas sane ngiket pekulawangan.
- (5) Ngajegang kasukertan seraja druwening Banjar miwah druwening pawongannya sami.

a i SARGA III
WIWEDANGAN LAN TETERAPAN

Pamos 6.

- (1) Wates wiwedangan palemahan Banjar kemanggehang antuk paruman Banjar.

- (2) Anut ring muncuk lungsur cacah jiwa pawongannya pah-pahan Banjar rawuhing wates wewidangannya wenang robqh manut ring pamutus paruman Desa.
- (3) Banjar wenang kapah dados tetémpekan manut pemutus paruman Banjar.
- (4) Awig-Awig kalih perarem Banjar tan wenang lémpas ring Awig-Awig miwah perarem Desané, saha teher kelingga tanganin antuk Kelian Banjar/Bendésa Adat maka pemikukuh dumugi dados lumaksana.
- (5) Banjar Adat patut madrruwé piranti-piranti pamekasnya balé Banjar miwah kulkul.

Pawos 7.

- (1) Sehanan tetempekan tan wenang ngardi Awig-Awig miwah perarem-perarem.
- (2) Tempékan kemon mawak pahan, sinanggeh tangan sukuning Banjar.

SARGA IV
SUKERTA TATA PEKRAMAN

PALET I
INDIK KRAMA

Pawos 8.

1. Sane kebawos warga Banjar Adat Pengaji sehananing sang jumenek wiadin tan jumenek medruwé peumahan ring pewidangan Banjar Adat sane megama Hindu saha tinut ring Awig-Awig lan daging perareman Banjar, miwah sepemargin krama Banjar Adat Pengaji.
2. Sane kebawos Krama Banjar Adat Pengaji, warga Banjar sane sampun merabian ngamong karang wiadin tan ngamong karang, nyungsung Kahyangan tur satinut ring Awig-Awig lan perareman-perareman.

Pawos 9.

1. Krama Banjar Adat Pengaji madudon-dudonan sekadi ring sor puniki :
 - (1) Krama pengarep sane ngamong karang pecatu.
 - (2) Krama Roban, Krama Banjar Adat sané sampun merabian nanging tan ngamong karang pacatu.
 - (3) Ayah Balu, sané palas merabian utawi seda lanang wiadin istri.

Pamos 10.

1. Kawit sane dados Krama Banjar Adat Pengaji mekadi ring sor puniki :
 - (1) Kawit jumenek ring Banjar Adat Pengaji sakéng leluhurnya.
 - (2) Kawit rawuh saking désa sewosan, jumenek ring banjar Adat Pengaji melarapan sakéng rahayu.
 - (3) Kawit antuk pawiwahan, pretisentana miwah peperasan.

Pamos 11.

1. Panemaya tedun mekrama Banjar Adat Pengaji inggih punika:
 - (1) Melarapan antuk pawiwahan.
 - (2) Risedekkala nyelidiinin utawi nyelosin ayah reramannya.
 - (3) Yening sang sampun merabian jumenek ring Banjar Adat Pengaji (sakéng désa séwosan), mewaneng asasih, wenang katedun~~ang~~ mekrama Banjar Adat meduluran pamaritetes antuk I Prajuru.
2. Sang Pacang tedun mekrama kepatutang :
 - (1) Sumanggup nyawi Kahyangan Desa.
 - (2) Satinut ring Awig-Awig, perarem, paswaran lan pamitetes pekraman.
 - (3) Sang pacang tedun mekrama saken~~g~~ Desa séwosan keni dudon-dudonan manut daging perareman.
3. Sane kapatutang nyalukin ayahan Krama luwiré :
 - (1) Purusa muah predana manut dresta tur kdasar~~in~~ antuk daging perareman.
 - (2) Nyerodang ayahan kebawos sah, yening sampun kesahang antuk Prajuru manut perareman.

Pamos 12.

1. Sinalih tunggiling kulawarga wusan me-Krama Banjar Adat, ~~parade~~ kulawarga inucap :
 - (1) Megingsir linggih utawi metilar sakeng wewidangan Banjar Adat Pengaji.
 - (2) Kenorayang antuk Krama Banjar
2. Sulur kalih tata ngenorayang, luwiré :
 - (1) Pastika wénten sudosan ipun.
 - (2) Tan satinut ring pituduh Prajuru indik nyupat nges~~ah~~hin solah prawreti.
 - (3) Katiwakin peminanda norané olih Kelihan Banjar utawi Bendésa Adat.
 - (4) Pamidanda ngenorayang inucap katur ring Banjar Adat Pengaji.

Pamos 13.

1. Sahananing Krama Banjar Adat Pengaji keni ayah-ayahan:
 - (1) Krama Pengarep keni ayah-ayahan Banjar Adat.

- (2) Krama Roban keni ayah-ayahan Roban.
 (3) Wewidangan lan wewilangan ayah-ayahan Krama sane sewosan manut perarem.
- ②. Sahananing Krama Banjar Adat Pengaji keni papeson :
 (1) Krama Pengarep keni papeson memungkul.
 (2) Krama roban miwah sane sawosan keni papeson manut wipunannyane medasar antuk perarem.
- ③. Swadharmaning Krama Banjar Adat Pengaji manut ayah-ayahan :
 (1) Satinut ring Awig-awig, Dresta, Peswaran lan Perarem.
 (2) Ngutsahang mangda Krama Banjar Adat nyewjer manut patitis.
 (3) Ngemargiang sehanan deda^Wuhan Prajuru kalih Pemerintah/guru Wisesa.
- ④. Prade wnten Krama tan satinut kadi bawos ring ajeng keni pamindanda manut ring daging perareman.

PALET 2 INDIK TAMU

Panos 14.

1. Sane kebawos tamu inggih punika sang jumenek utawi merepan ring wawengkon Banjar Pengaji sanistanyane awengi, sangkaning :
 (1) Melelungan.
 (2) Sesudian Désa sewosan utawi Pemerintah/Guru Wisesa.
 (3) Duduk-dudukan utawi menyundulang raga.
 (4) Ngerereh pangupajiwa miwah sané sewosan.
2. Krama sané nampi tamu patut atur supeksa tur polih penguak olih Prajuron Banjar.
3. Tamu sane lanang utawi wadon tur sampun marabian prade jumenek jantos asasih suwénnyané, patut katedunang mekrama tur keni penaub manut perareman.
4. Tamu sesudahian Pemerintah sane jumenek sareng rabin nyané jantos asasih patut ngelaksanayang/ngemargiang pesilakraman.
5. Swadharmaning tamu :
 (1) Tinut ring tetiwak Banjar Adat nganinin indik ngupadi kesukertan Banjar ring sekala.
 (2) Tan wenten nungkasin sepemargian Awig-awig lan peswaran Krama.
6. Prade wnten tamu tan satinut ring ucapé sekadi ring ajeng tur lumaksane duskerti patut keni pemitanda manut perareman.

PALET 3
INDIK PRAJURU

Pawos 15.

- ① Banjar Adat Pengaji keénterang olih Bendesa Adat miwah Kelihan Banjar tur kerombo antuk Prajuru pinaka pengénter Banjar lan Krama.
- ② Sekeha-sekeha sane wenten ring wewengkon Banjar Pengaji keénter olih Kelihannyane suwang-suwang satinut ring Bendesa Adat lan Kelihan Banjar Pengaji.
- ③ Bendesa Adat miwah Kelihan Banjar keadegang melarapan antuk pemilihan olih paruman suang-suang.
- ④ Gaguat pacang dados Prajuru banjar patut majalaran kadi ring sor piniki :
 - ① Bendesa Adat miwah Kelihan keadegan mewiwit sakeng ayah ngarep.
 - ② Mawiwit sakeng sasudian Krama Banjar.
 - ③ Mewaneng sajeroning limang warsa.
 - ④ Prade sampun puput limang warsa, patut keaturang ring krama tur mangda kawéntenang sesudian anyar.
 - ⑤ Sang sampun puput dados Prajuru, dados malih kepilih/kesudi manut daging perareman.
 - ⑥ Wikan ring sajeroning Adat miwah agama.
 - ⑦ Tatas uning ring ngewacen lan nyurat.
 - ⑧ Tan cenala ring raga lan ring sajeroning garba (satula-sarira).
 - ⑨ Risampun pamilihan punika jangkep, kawéntenang upacara pabersihan, ngemargiang upasaksi ring pura (prahyangan).
- ⑤ Prade sinalih tunggil wénten Prajuru wusan, melarapan seda, lumaksana tan satinut swadharmaning Prajuru, kawéntenang sasudian anyar olih Krama, ngelanturang laksanakan nyane mangda tetep sengkering limang warsa taler patut nyukserahang sesudian punika ring Krama.
- ⑥ Séwosan ring gaguat sané mungguh ring ajeng taler mangda manut ring gaguat Pemerintah/Guru Wisesa.

Pawos 16.

- ① Bendesa adat lan kelihan banjar kesanggra olih prajuru-prajuru :
 - ① Petajuh, pinaka wakilnyané.
 - ② Penyarikan.
 - ③ Kesinoman.
2. Wewidangan penyanggrannyané madudon-dudon manut wewidangan miwah pekaryannyane.
3. Wewilangan pangerombo manut-dangan kawéntenang pemargiannyane manut desa, kala, patra lan paétangan prajuru.
4. Sajeroning ngéterang kasukertan sekala niskala, yadnya ring kahyangan minakadi upacara kasucian miwah

sahanannyané, kaénter olih bandésa pura kahyangan, karombo olih prajuru tur ketuntun olih pemangku, Kebayan lan Juru Putih séwosan.

Pawos 17.

- ① Suadharmaning Bendésa Adat lan Kelihan Adat ring Banjar Adat Pengaji luwuré :
 - ①) Ngénterang paruman-paruman Banjar manut patitis.
 - ②) Ngénterang pangelaksanaan sadaging Awig-awig miwah pamutus perareman.
 - ③) Ngeraksa saha ngatur tatane nganggé seraja brana Druwén Banjar.
 - ④) Nuntun tur ngénterang Krama rawuhing warga Banjar ngupadi kasukertan sekala niskala.
 - ⑤) Nuntun saha nyaksinin tata-cara miwah sangaskaraning kauripan mabuat, sané ngilitan sulur pekulawargan.
 - ⑥) Nuntun saha ngénterang I Warga Banjar ngupadi nginggilang Sang Hyang Agama, kasucian Kahyangan sami, kasucian wawengkon, kasucian palemahan, miwah tata caraning nganggé setra.
 - ⑦) Mawosan kalih niwakang pamutus marep ring wicaran wargannyane.
 - ⑧) Ngewakilin Banjar matemuang bawos ring sape sira ugi.
 - ⑨) Miwah sané séwosan manut dresta.
2. Ritatkala ngenterang krama inucap, Bendésa Adat lan Kelihan Banjar sadurungé patut ngawéntenang :
 - (1) Pawirasan ring Prajuru kalih para Sadaka utawi Sulinggih sami.
 - (2) Paétengan mangda wargané sami polih galah ngupadi pangupajiwa, ngutsahang kawuruhan, kalih usaha niri-niri sewosan.
3. Tata caraning ngelaksanayang swadharma ring ajeng tanmaren anut ring Awig-Awig Perarem, Dresta, miwah Pemutus-Pemutus paruman Banjar.
4. Pangelaksanaané ring ajeng patut kesiarang ring paruman Banjar kapungkur ipun.
5. Bendésa Adat miwah Klihan Banjar suma kuta natak pamutus paruman banjar, nganinin pengelaksana swadharmaning sowang-sowang.
6. Pepalihan swadharmaning Prajuru pinaka penyanggran Bendésa lan Kelihan ring Banjar Adat Pengaji, inggih punika :
 - 1) Swadharmaning Petajuh luwuré :
 - (1) Nureksa sahananing karta brana druwén Krama Banjar.
 - (2) Nawuhin kesinoman mangda ngarah ritatkala jagi kawéntenang paruman ring Banjar.
 - (3) Ngabel pekaryan Bendésa utawi Kelihan ritatkala wénten kapiambeng.
 - (4) Nyanggra sahananing pakaryan Bendésa lan Kelihan.

- 2) Swadharmaning penyarikan luwiré :
 - (1) Nyuratansahamanan druwen Krama Banjar.
 - (2) Nyuratandedosan utawi sépan I Krama.
 - (3) Nyanggra sehananing pekaryan Bendésa lan Kelihan Banjar.
- 3) Swadharmaning kesinoman luwiré :
 - (1) Ngarah utawi mededauhan indik sekancan pituduh Petajuh.
 - (2) Nyacah utawi nyarca krama ritatkala kawéntenang paruman ring Banjar.
 - (3) Ngempon pekaryan sané wénten ring perantenan ritatkala kemargiang piodalan ring Pura Penyiwian Krama Banjar Adat Pengaji.
 - (4) Nyanggra sahanan pekaryan Bendésa lan Kelihan Banjar.

Pawos 18.

1. Ulih-ulihan Bendesa Adat lan Kelihan Banjar miwah Prajuru sané séwosan luwiré :
 - (1) Upon-upon tanah laba pura utawi tanah druwen Banjar séwosan.
 - (2) Leluputan seluwiring pekenan-pekenan reramon.
 - (3) Cenengan sehanan duman ring Banjar.
 - (4) Miwah ulih-ulihan séwosan manut perarem Banjar.

Pawos 19.

1. Swadharman Prajuru-Prajuru sewosan wantah nyanggra nyerayaning Bendésa Adat miwah Kelihan Banjar manut dudonan.
2. Ulih-ulihan Prajuru-Prajuru inucap manut kadi daging perarem Banjar manut dudonan.

Pawos 20.

1. Prajuru Banjar Adat Pengaji merarian mawiwit sangkaning:
 - (1) Sampun telas wanang wiadin sengker dados Prajuru.
 - (2) Sang Prajuru inucap séda.
 - (3) Sang Prajuru inucap tan prasida ngemargiang geginaning Prajuru, mawit sangkaning sungkan tahunan utawi pialang abot sané séwosan.
 - (4) Sangkaning pinunas ngeraga tur sampun kalugra olih pemutus paruman Banjar.
 - (5) Kerarianang olih krama, sangkaning iwang pemargi utawi tan manut ring Awig-awig, Dresta, Perarem, miwah pamutus paruman banjar.

PALET 4
INDIK PARUMAN, PESAMUAN, SANGKEPAN
MIWAH PERAREMAN

Pawos 21.

1. Indik petedunan krama ring Banjar Adat Pengaji kebinayang dados petang pawos inggih punika:
 - (1) Paruman.
 - (2) Pesamuan.
 - (3) Pesangkepan.
 - (4) Perareman.
2. Sané kawastanin Paruman inggih punika, pesamuan sane katedunin antuk Krama lan warga sami, ritatkala jagi kawentenang indik wicara sane mabuat dahat. Indik Paruman puniki kawentenannya dados kalih pawos; Paruman lumrah kawentenang nyabran atiban (1 tahun), miwah Paruman Padgatakala riantukan wnten kawicarayang perindikan sané mebuat pisan.
3. Pesamuan inggih punika, paruman malit sane katedunin antuk sowang-sowang Krama, mekadi Krama Banjar, Krama Roban, Sekeha Gong, Daha-Truna miwah sané sawos-sawosan, riantukan kawentenang wicara padgatakala.
4. Pesangkepan inggih punika, pesamuan sane katedunin antuk Krama sami ngawicarayang pariindik padruwen Krama, kaping ajeng indik jinah. Pesangkepan kawentenannya ngesasih ring rahina Tumpek.
5. Perareman inggih punika pesamuan sane katedunin antuk wargané sami kaping ajeng sané sampun nanggap Krama, ngawicarayang indik Awig-Awig sané pacang katetepang.

Pawos 22.

1. Sehanan patedunan kocap ring ajeng kaduleran antuk Wewarahan saha sawaran kulkul manut dresta.
- *). ② Sang pacang tedun mangda trepti ngangge busana adat manut dresta.
- *). ③ Sinalih tunggil Krama utawi warga tan manut ring ajeng keni pamidanda manut pararem.

PALET 5
INDIK KULKUL

Pawos 23.

1. Kulkul manut kawentenannya ring Banjar Adat pengaji sekadi ring sor puniki :
 - (1) Kulkul Banjar Adat.

- (2) Kulkul Roban.
 - (3) Kulkul Daha-Truna.
 - (4) Kulkul Yadnya Kulkul Gede/Desa
 - (5) Kulkul Pajenengan.
 - (6) Kulkul Sekeha Gong, miwah sane sēwosan.
2. Kulkul manut ring genah lan wigunannia, luwire :
- (1) Kulkul Banjar Adat genah ipun ring wewidangan Bale Banjar utawi ring bale Kulkul. Katepak ritatkala jagi wenten paruman Banjar, Sangkepan Krama Banjar miwah petedunan sane sewosan.
 - (2) Kulkul Roban genah ipun ring Bale Kulkul wewidangan Bale Banjar, wigunannia katepak prade wenten petedunan Krama Roban.
 - (3) Kulkul Daha-Truna genah ipun ring wewidangan Jaba Pura, wigunannia, katepak prade wenten petedunan Daha-Truna jagi ngaturang ayah ring sajeroning pura ring sewidangan Banjar Adat Pengaji.
 - (4) Kulkul Yadnya genah ipun ring wewidangan Pura. Wigunannia katepak ritatkala ngemargiang wali, nedunang Ide Betara miwah sane sewos-sewosan.
 - (5) Kulkul Pajenengan genah ipun ring wewidangan Pura Puseh Gunung Pingit. Prade wenten katurang wali utawi piodalan ring Pura Puseh Gunung Pingit kadulurin antuk tetepakan Kulkul Pajenengan inucap. Semaliha yening Ide Betara Ratu Niang jagi Katedunang taler Kulkul Pajenengan inucap katepak.
 - (6) Kulkul Sekeha Gong taler genah ipun ring wewidangan Balé Banjar. Katepak prade Sekeha Gong inucap jagi tedun megambel utawi jagi kawentenang parummnnia.
- *) 3. Kulkul inucap tan wenang katepak yening tan manut kadi daging Awig-Awig puniki.
4. Tabuh tatepakan kulkul Banjar Adat pastika masēwos-sēwosan manut tatujonnia, luwire :
- 1) Tengeran upakara yadnya ring pura utawi ring banjar.
 - 2) Tengeran wenten sinalihtunggil wargan Banjaré sané séda, suarannia sekadi ring sor puniki :
 - (1) Mesuara ping lima alon, makacihna wenten rare séda/padem, nanging durung akupak. Dedauhannia semeng.
 - (2) Mesuara atulud alon, makacihna wenten warga sané séda/padem sampun akupak utawi tutup usia. Dedauhannia semeng.
 - 3) Tengeran wenten sinalihtunggil warga Banjar sané mapewarangan. Mesuara ping sia alon rauh ping solas semakéh ipun. Dedauhannia nyoréang.
 - 4) Tengeran wenten tutupan lan pangembak mesuara ping nenem. Dedauhannia semeng.
 - 5) Tengeran ngawit ngelaksanayang pekaryan kadi sampun kearahang utawi kesiarang, kalih tulus biasa.

- 6) Tengeran wénten patedunan lumrah, suarannia kalih tulud.
- 7) Tengeran ngurungan ngelaksanayang pekaryan utawi petedunan, suarannia ping tiga alon.
- 8) Tengeran paruman prajuru, suarannia ping pitu.
- 9) Tengeran wénten baya, kaplegandang, kemalingan, ngamuk, kebégal, kebaak, miwah baya pati séwosan, suarannia bulus atulud tigang tulud nungkak.
- 10) Tengeran wénten umah puhun suarannia bulus atulud ngelantur.
- 11) Tengeran ngemedalang raré, mesuara ping 4 (patpat) alon Dedauhannya semeng.

Pawos 24.

- p. *)
1. Kulkul Banjar tan wenang katepak yan tan sangkaning ~~bebebanan~~ utawi pituduh kelihan Banjar manut dudonan, sejawaning rikala pacang ngewéntenang tengeran nganin kadi munggah ring angka 9) miwah angka 10) ring ajeng.
 2. Sang nepak tan sangkanin petuduh, patut digelis atur upeksa ring kalihan maka buatan panepaké kadi ring ajeng.
 3. Kulkul Banjar Adat Pengaji puniki, patut nyarengin katepak, pradé wenten sinalihtunggil kulkul Banjar séwosan nyihnayang wénten amuk utawi bayapati.
 4. Suaran kulkul tengeran pakaryan, patut katedunin antuk ayahan manut ring daging dedauhan utawi siaran.
 5. Suaran kulkul tengeran baya, patut katedunin antuk sahanan ayahan lanang, inggihan ngarep, Roban Rawuhing Truna, saha gegawan pamitulung anut rupan bayané.

Pawos 25.

- p. *)
1. Sané wenang nepak kulkul, luwiré :
 - (1) Prajurun Banjar.
 - (2) Warga sangkaning pituduh Prajurun Banjar.
 - (3) Warga ritatkala wenten baya, nanging sesampune mapiuning ring I Prajuru maka gaguat panepake inucap.
 2. Yening wénten sinalihtunggil warga tan nguningayang indik panepakan kulkul inucap, wenang kedanda manut perareman.

PALET 6 INDIK LELUPUTAN

Pawos 26.

1. Banjar Adat Pengaji mapawéh leluputan ayah-ayahan utawi pekenan-pekenan ring sang inggiling linggih utawi sang kawelas asih.

2. Sor singgih leluputané miwah bacakan sang luput keungguhang ring perareman.
3. Sejabaning Prajuru Desa, sané pastika patut polih leluputan, pamekasnia :
 - (1) Para Sudaka.
 - (2) Para Pemangku lan Kubayan.
 - (3) Sang sakit tahunan.
 - (4) Wong cedangga banget.
 - (5) Wong sane ubuh.
4. Krama balu lanang polih leluputan ayahan isteri, wong balu isteri polih leluputan ayahan lanang.

PALET 7
INDIK DRUWÉN BANJAR

Pados 27.

Sané sinanggeh druwen Banjar Adat Pengaji, luwiré:

1. Sehanan Pura penyiwian Krama Banjar Adat Pengaji, mekadi:
 - (1) Pura Murwa Bhumi.
 - (2) Pura Puseh Gunung Pingit.
 - (3) Pura Sukamerih.
 - (4) Pura Catur Bhuwana.
 - (5) Pura Tegal Suci.
 - (6) Tugu Tanggun Desa.
2. Tanah Pelaba Pura lan telanjakan Pura utawi Balé Banjar, luwiré:
 - (1) Pelaba Pura Murwa Bhumi, 27 are (pitulukur are), megenah ring subak Tinjak Kayu.
 - (2) Pelaba Pura Murwa Bhumi, 22 are (kalih likur are), magenah ring subak Babakan.
 - (3) Pelaba Pura Puseh Gunung Pingit, 37 are (tigang dasa pitu are), ring subak Tinjak Kayu.
 - (4) Tanah telanjakan Pura Murwa Bhumi, 17 are (pitulas are).
 - (5) Tanah telanjakan Pura Puseh Gunung Pingit, 12 are (roras are)
 - (6) Tanah tegak Bale Banjar.
3. Tanah panukayan Banjar/kesugihan, luwiré:
 - (1) Tanah carik, 47 are (petang dasa pitu are), megenah ring subak kembang Kuning.
 - (2) Tanah tegal, 22 are (dasa are), megenah ring lor Banjar Pengaji.
4. Lelangunan, mekadi :
 - (1) Tetabuhan, seperangkat gong.
 - (2) Ilén-ilén, seperangkat pengangge légong, pengangge topéng, pengangge arja, pengangge rejang miwah baris.

5. Sekancan druwen Banjar Adat sané kawéntenania ring Pura, mekadi :
- (1) Jempuna kéh ipun petang perangkat.
 - (2) Tumbak roras katih.
 - (3) Payung Pagut Kekalih.
 - (4) Bandrangan kekalih.
 - (5) Madik Pajenengan kekalih.
 - (6) Taméng endé akutus (8).
 - (7) Pecut asiki.
 - (8) Karas petang diri, mekadi : Meraga Siwa, Galuh, macan lan Yuyu.
 - (9) Rangda kekalih.
 - (10) Kelika asiki.
 - (11) Jinah kerpian petang gampel.
 - (12) Siwakrana aperangkat.
 - (13) Raja Penganggé petang perangkat sané wénten ring Pura Murwa Bhumi, Pura Puseh Gunung Pingit, Pura Sukamerih lan Pura Catur Bhuwana.

Pamos 28.

1. Padruwén Banjar Adat, Pelaba Pura lan pemupunnia, wenang kaétangan olih I Prajuru.
2. Pikoliu druwen Banjar Adat lan pamupunnia keanggén prebia piotalan miwah mecikan wewangunan.
3. Nyabran sangkepan Banjar Adat, pangemong druwen Banjar Adat ngawéntenang parindikan munjuk lungsuring padruwén ikrama, antuk ilikita pastika.
4. Sakaluwiring druwen Banjar Adat Pengaji Patut wénten ilikitania.
5. Pelaba Pura kekaryaning antuk Penandu.
6. Busana keraksa antuk Pemangku utawi kagenahang ring gedong simpen.
7. Tan kalugra ngadol sehanan druwen Banjar Adat, sejawaning kagunayang manut petitis tur kesungkemin antuk I Krama.
8. Tanah tatakan ayah miwah pawongan ring karang inucap kaetang antuk kulawarga sane patut, tur keundulang olih kulawarganyané.

PALET 8
INDIK PUPULAN

Pamos 29.

1. Sehanan karang pupulan lan telanjakan patut :
 - (1) Pastika wenten wates ipun.
 - (2) Gegalengan kauluan (Kulon-Wetan).
 - (3) Mapemendal karurung utawi kemargine, tan wenten kabebeng.

2. Kelihan Banjar patut ngutsahang mangda sami karang kadi ring ajeng kaweajeng kawéntenannia.

Pawos 30.

1. Sahanan Krama patut ngewatesin karangnyané sowang-sowang jantos sidha trepti nyatur desa.
2. Wates karangé sané majepitan patut kategen olih kramané sané mehuluan ke watas inucap manut ~~desa~~ta.
3. Taru miwah ulih-ulihan sané meurip ring watese kadi ring ajeng, kadruwé olih krama sane negen inucap.

Pawos 31.

p. *)

- ① Sinalih tunggil Krama tan kalugra ngalah-alahang tanah pekarangan, tegal padruwen anak sewosan, punapi malih druwen Banjar Adat sane kesinanggeh suci. Yening wenten Krama melaksana asapunika, wenang ketiwakin pemedanda manut perarem.
2. Nanggap lan nimbalangayah kadi ring sor puniki :
 - (1) Sowang-sowang karang sané ketanggap tur keayahang antuk krama Banjar Adat, patut kagenahin antuk sang ngayahang.
 - (2) Yan pradé wenten karang tan kagenahin tur tan wenten ngayahang patut dados druwen Banjar.
 - (3) Sowang-sowang Krama sane nanggap karang, patut magenah ring karang inucap.
 - (4) Yan jantos tigang sasih karang inucap tan wenten ngenahin, wenang karang punika ketimbalang olih Prajuru ring sang mabudi.
 - (5) Yan wenten Krama pacang wusan nanggap karang inucap, patut ngewaliang ring Prajuru, tur ketimbalang ring sané mabudi sewosan. Pradé sane mabudi langkung ring adiri, Prajuru patut ngawétenang pengilekitan manut kadi paruman.
 - (6) Krama ngarap' sané pacang ketimbalang, mangda katinutin antuk warisnia, tur polih pematut ring Prajuru.
 - (7) Krama satunggal kayogya ngayahang/nanggap karang Banjar langkungan ring asasih.

PALET 9
SUKERTA PAMITEGEP

KAPING 1
KARANG LAN TEGAL

Pawos 32.

1. Sang ngamong karang Banjar Adat patut ngewatasin karang inucap antuk pagehan wiadin témbok, pinih ajeng sané marep kemarginé mangda katon asri.
2. Wates sisi~~x~~ lor miwah sisi~~x~~ wétan patut kekaryanin antuk sang madruwe karang reh punika mewaste megalang keuluan.
3. Padé pageh inucap kerasayang ngelikadin yan padé arsa para penyanding kengin mangda watese ngangge pinget patok, kesaksiang antuk Kelihan Banjar Adat.
4. Pradé wénten karang kabebeng, patut keutsayang marginipun, olih Prajuru sami manut ring perarem.

Pawos 33.

1. Tanah tegal patut megalang ketében, petang asta wates sisi~~x~~ kulon muah lor patut kekaryanin tur kepiara antuk ~~antuk~~ sang madruwé tegal.
2. Watesé inucap kengin antuk pagehan wiadin prasihna pal sakéng Kantor Pendaftaran Tanah (KPT)

Pawos 34.

- P. *)
- ① Sinalih tunggil Krama Banjar tan keluarga:
 - (1) Ngelalah tanah tegal sinanggeh suci, mekadi tegak Pura, Balé Banjar, lan Tegal Suci.
 - (2) Ngelalah tegal, lan karang jadma séwosan, margin lan selanturipun.
 - (3) Ngembahang toya wit wewalungan, pewarigan miwah sané séwosan, kepekarangan Krama séwosan.
 - (4) Ngentungan wangken wewalungan ketukadé utawi kepekarangan Krama séwosan.
 - ② Pradé sinalih tunggil Krama memurung kecaping ring ajang:
 - (1) Manut angka 1(siki), sejawaning patut ngewaliang sane kelalah, keni pamindanda gung arta miwah penyanggaskara manut perareman.
 - (2) Manut angka 2(kalih), kewaliang sane kelalah miwah kedanda gung arta manut perareman.
 - (3) Manut angka 3(tiga), patut nyampetin toya inucap utawi ngaryanang songbah sareng penyandingnyané.
 - (4) Manut angka 4(papat), patut nanem wangké inucap tur kedanda gung arta manut perareman.
- P. *)

Pawos 35.

1. Tanggal lan telanjakan karang tan kelu~~arga~~ keenengan, patut ketandurin pala bungkah, palawija, lan pala gantung.
2. Pradé wéten sané memurung kani~~ga~~ kapetinget antuk Prajuru Banjar.

Pawos 36.

1. Yaning Wéten Krama sané cemput :
 - (1) Sahanan padruwénia keku~~asa~~ antuk Banjar Adat.
 - (2) Krama Banjar Adat patut ngelaksanayang upacara pitra Yadnya.

KAPING 2

INDIK PEYAYON LAN TETANDURANPawos 37.

1. Ngawit tanem tuwuh patut ngajerowang sakéng wates, kalih meter tengah.
2. Wit taru~~keluarga~~:
 - (1) Mentik sajeroning wates.
 - (2) Ngelintangin wates, bilih-bilih ta mewastu mayonin penyandingnyane.
3. Pradé wénten me~~menting~~ sekadi kecaping ring ajeng, kengin kewarah antuk sang nruwénang wit, ngerab~~ah~~ taru inucap.
4. Yening sampun jangkep ping tiga nyadokang taler tan kerebah, kengin sang nyadokang ngerab~~ah~~ taru inucap, tur kepinaro kepah tiga, asiki katur ring Prajuru sané maritatas, sané kekalih kebagi antuk sang madruwé wates.
5. Pradé wénten sinanggeh mayonin sekadi kecap angka (2) ring ajeng, sang kejerihan patut atur supéksa tur sumanggup notor utawi senisttania nyepat gantungin.
6. Pradé wénten wewangunan jantos karubuhin, sané keni prabea saha penyangaskara, inggih punika :
 - (1) Sang nruwenang wit sinanggeh mayoning, risampun polih kewarah.
 - (2) Sang notor, munggul utawi ngerab~~ah~~ taru inucap.
7. Taru inucap ketaban antuk sang kerubuhin.
8. Kerubuhin taru olih kepanca baya prabeannyane pada matenga.
9. Pradé tetanduran utawi pepayonan keni merana manut penglotika sang mewarah, patut kepademang tur kegentosin.
10. Pradé meke~~kenan~~ sungga utawi wisia ring pabe~~anan~~, patut mesadok ring Prajuru Banjar, yéning memurug kedanda manut perareman.

KAPING 3
INDIK WEWALUNGAN

Pamos 38.

- p. *)
1. Sehanan Krama Banjar sané miara sakeluwiring wewalungan, mekadi :
 banteng, kebo, kuda, bawi, kambing, miwah wewalungan suku patpat sané séwosan, patut siaga nitening negul utawi ngelogor, mangda tan ngerusak karang miwah pabeanan, bilih-bilihta jantos ngeletihin Kahyangan utawi Pemerajan lan Sanggah Krama séwosan.
 2. Pradé wéten sekadi ring ajeng, patut kepelungguhang sang madruwé wewalungan inucap.
 - ③ Yening jantos ping tiga kepelungguhang, ngelantur kesadokan ring Prajurun Banjar mangda ketiwakin pemindanda sekadi ring sor punuki :
 - (1) Ngewaliang wit sané rusak muah prabia sané kepocolang.
 - (2) Keni upacara caru manca sata yéning wewalungan ngeleb jantos ngeletehin kahyangan lan Pemrajan.
 - (3) Taler kengin wewalungan inucap ketaban antuk tatacara :
 - 1) Sang naban digeliga nandan wewalungan inucap, marep ring Prajuru Banjar Adat.
 - 2) Sang medruwé wewalungan inucap patut naur penebus tetabuhan lan pepocolan kerusakan wit, manut penglokikan daging perareman.
 - ④ Pradé wéten asu nyegut ring margine, kengin kepademang antuk sang kebaya saha madruwe asu tan ngewicarayang tur mianin tamba wantah sepisan.
 5. Sané patut ngelaksanayang indik tetabatan ring Banjar Adat Pengaji inggih punika Hansip miwah Handra, miwah warga séwosan.
 - ⑥ Gung arta pemindanda ring tetabatan inucap manut pepareman.
 7. Bilih wénten wewalungan sakéng Banjar séwosan ngerusak, patut wewalungan inucap katur ring Krama jantos wénten sané ngangkenin.

Pamos 39.

- p. *)
1. Sapasira ugi tan kelugra nganggon ring :
 - (1) Pelemahan tegak Kahyangan lan Pemrajan.
 - (2) Pundukan sawah miwah tegal pabianan Krama séwosan.
 2. Pradé wéten sinalihtunggil sané mumurug sekadi kecap ring ajeng keni pemindanda saha maweweh penyanggaskara manut kecap ring angka (1)

KAPING 4
INDIK WEWANGUNAN

Pawos 40.

- P. 40
1. Wewangunan patut :
 - (1) Nganggé gegulak/sikasta kosala kosali, senistane manut ring petitis niskala.
 - (2) Tan yogya nyayubin wewangunan penyandingnya.
 2. Pradé jantos nyayubin, risampun kesadokang ring Prajuru, keni pemitanda manut perareman tur nganutin indik wewangunan.
 3. Krama sané pacang ngewangun patut masadok ring Prajuru, sedurung polih ilikita patra (wakwakan) durung kalugrayang ngewangun.

KAPING 5
INDIK BHAYA

Pawos 41.

- P. 41
1. Bacakan panca bhaya luwiré :
 - (1) Jiwa bhaya, upami keparikosa, kepelegandang, kepancadara, luwiré : majegan, nyekuk, kekaplakkin, kejugur, neluh nesti anerenjana, lan selantur ipun.
 - (2) Arta bhaya, kemalingan duk rahina wiadin wengi, mekadi wewalungan artaberana, tanem tuwuh, lan selantur ipun.
 - (3) Geni bhaya, upami umah puhun.
 - (4) Toya bhaya, upami belabar.
 - (5) Lindu bhaya, upami umah wiadin tembok bah santukan weten gejer/linuh.
 2. Sané kesinanggeh pelegandang, melaibang anak istri antuk parikosa miwah paradara, ngerumun utawi meranin anak istri sedang hana ring pemereman.
 3. Sehanan Krama Banjar patut digelis atur uning ring Prajuru ritatkala wnten jadma keni utawi melaksana panca bhaya.
 4. Pradé dahat sarat kewntenannyané, kengin nepak kulkul pamitlung anut ring rupan bhayané.
 5. Turmanin patut medana punia ring sang kehanan bhaya jagat, mekadi : bhaya geni, bhaya lindu lan bhaya toya.
 - ⑥ Pradé wnten sinalihtunggil jadma sané ngardinin panca bhaya, wenang keni pemitanda manut perarem. Panca bhaya inucap luwiré :
 - (1) Dhatikrama.
 - (2) Agnida.

- (3) Rajapisuna.
 (4) Sadurgama.
 (5) Wisada.
 (6) Anesti aneluh nerangjana, lan selanturipun.
 7. Pradé wénten wewangunan Pura lan Pemrajan keni panca bhaya, patut ngawéntenang caru manca sata, raris melasti ke segara.
 8. Panca bhaya sané kelaksanayang antuk jatma, keñter antuk Krama, Prajuru Banjar Adat lan Guru Wisesa.
 9. Sehanan panca bhaya melarapan antuk geni ngamuk, patut keni padudus miwah pamidabda manut perarem.

KAPING 6 INDIK PENYANGGRA BANJAR

Pawos 42.

1. Banjar Adat wenang ngunggahang tatacara nyanggra pekaryan pesukadukan I Krama.
2. Pekaryan sinalihtunggil Krama sané mabuat, patut kesanggra tur keñtangan antuk Kelihan Banjar.
3. Banjar patut medarsana antuk rasa paramitulung ring sang mekarya, kemawon tan maren miteketing kesujatian Krama Banjar.
4. Bilih karya abot, Banjar wenang ngerereh pitulung ring Banjar penyanding.
5. Pekaryan sané patut kesuserah luwiré :
 (1) Ngewangun Karya, minakadi Dewa Yadnya, Pitra Yadnya lan Manusia Yadnya ring pakubon.
 (2) Ngingsirang wewangunan, lan selanturipun.

Pawos 43.

1. Pradé Krama Banjar ngawéntenang pasubaya sajeroning pangupajiwa antuk nanggap tanah tegal wiadin madunungan, ngaryaning pakubon ring Banjar sawosan, makedasan ingon-ingon, mangda prasida nganutin kewéntenan uger-uger ring Guru Wisesa, bilih mabuat pisan patut kawéntenang ilikita lan penyaksi Prajuru Banjar Adat lan Dinas, pengaptiné mangda tan ngawinang pocol sinalih tunggil Krama, tur jati-jati pada arsa majalaran parama tulung.
2. Perindik pikolih pedanapunia sané kadruwe antuk Banjar Adat, pinaka kas sané kemargiang (keputrayang), mangda nganutin taler uger-uger ring Guru Wisesa (Pemerintah) sané kebawos Koperasi, caraning Banjar Adat mangda tan jantos ngawéntenang wicara ring bebanjaran mawiwit tan ngelawiang seselangan Krama manut tekén panemaya.
3. Ring usaha adol atuku makadi carik, tegal, miwah umah sajeroning Banjar utawi kedura Desa patut ngaturang dana punia ke Banjar.

SARGA V
SUKERTA TATA AGAMA
PALET 1
INDIK DEWA YADNYA

Pawos 44.

- ① Pelinggih penyiwian ring sewewidangan Banjar adat Pengaji Luir ipun :
 - (1) Purwa Murwa Bhumi
 - (2) Pura Puseh Gunung Pingit
 - (3) Pura Sukamerih
 - (4) Pura Catur Buana
- ② Rahina Piodalan lan aci-aci pamitegep ring sowang-sowang Pura inucap sekadi ring sor puniki :
 - ✓ ① PURA MURWA BHUMI.
 - (1) Buda Umanis Julungwangi.
 - (2) Nyabran asasih ngaturang pakeling rerahinan.
 - ✓ ② PURA PUSEH GUNUNG PINGIT
 - (1) Purnamaning kapat, yening kapiambeng kemargiang ring Purnamaning Kelima.
 - (2) Wrespati Wage Uku Sungsang, kemargiang upacara penyugian.
 - (3) Anggara Wage Dunggulan, ida betara lunga ke Pura Dalem Jagi katurang pabiakala.
 - (4) Wrespati Umanis Dunggulan (Umanis Galungan) kemargiang piodalan ngebek.
 - (5) Tilem Kanem nyaluk kepitu nedunang Ida Betara lunga ke Pura Dalem raris ke Mrajaapati, ke Pemuunan, ke Gedong Tegéh, selantur ipun mider ring sawewengkon Banjar Pangaji.
 - (6) Ring Jaga-jaga (Tilem Kesanga), kemargiang Upacara Pejagalan godel, pinaka pengrebu utawi aturan bakatan antuk Krama Banjar Adat Pengaji sané sampun ngemargiang pewayahan, yadian sané jumenek utawi sané medal sakéng wawengkon Banjar Adat Pegaji selamin ipun awarsa, kadulurin antuk suaran kulkul pajenengan ping tiga.
 - (7) Ring Tilem Kesanga sadurung Nyepi nuju Kajeng kemargiang Karya Mandak ring Tegal Suci.
 - (8) Upacara Sangkepan kawentenang ring rahina :
 - * Anggara Kasih kemargiang Sangkepan anaman antuk Krama Desa sané Wadon.
 - * Wrespati Keliwon kemargiang ajengan antuk Krama Desa sané Lanang.
 - * Ring Purnama kemargiang sangkepan :
 - Sangkepan sanganan antuk Krama Desa.
 - Sangkepan Ajengan antuk Daha Truna.

Sowang-sowang Sangkepan ring ajeng sané malarapan antuk suaran Kulkul Pajenangan ping tiga makacihna pamargin Sangkepan atulud.

✓ (3) PURA SUKAMERIH

(1) Buda Keliwon Matal.

(2) Upakara sangkepan kemargiang ring :

* Purnama, Sangkepan Sanganan kukus unti antuk Krama Desa sané Wadon

* Tilem, sangkepan ajengan atuk Krama Désa sané Lanang.

✓ (4) PURA CATUR BHUANA

(1) Buda Kliwon Gumbreg.

3. Pengaci ring Pura-pura inucap manut kecap Satra Agama saha kelaksanayang Nista, Madia, Utama, Manut kewēntenane lan perarem.

4. Paweweh Rerahinan ring Krama Banjar Adat Pengaji mekadi ring sor :

(1) Ring Balé Banjar, duk Tilem Kesanga kamargiang Pecaruan, maruntutan Perang sato/Tabuh Rah tigang seet kedulurin antuk pepranian selantur ipun kemargian Pengrupukan.

(2) Ring rahina Saniscara Kliwon Wayang kawentenang Upacara Gong.

(3) Ring Purnamaning Kedasa kemargiang Upacara Melasti, nedunang Betara sami.

Pawos 45.

1. Piodalan ring Pura Murwa Bhumi, Pura Sukamrih lan Pura Catur Bhuwana kemargiang antuk Pemangku nanging Piodalan ring Pura Puseh Gunung Pingit kamargiang antuk Kebayan manut deresta, tur kerombo olih Jero Kutus.

2. Ngadegang Pemangku lan Kubayan nganutin deresta sekadi ring sor puniki :

(1) Nyanjan.

(2) Ngawilang saking turunan(Waris).

(3) Kepilih/ketunjuk antuk ikrama.

(4) Manut tetimbang Paulun Desa.

5. Nganutin Dresta

3. Tan kawenang keadegang Pemangku lan Kubayan :

(1) Cedangga/Cenala (peceng, perot, cungik).

(2) Kegeringan, ila, ayan, lan buduh.

3. Ulah cacad, luwira: ngerabining wong arabi, memitra, lan saluirnia.

4. Prebeya ngewentenang utawi ngadegang Pemangku lan Kubayan kesanggra antuk :

(1) Krama Banjar Adat.

(2) Kulawargannia.

Pawos 46.

- ① Swadharmaning Pemangku lan Kubayan :
 - (1) Ngenterang Upacara Piodalan ring Pura utawi ring sowang-sowang pakubon Krama.
 - (2) Tan wenang salab sulab, yan mamurug wenang Pemangku lan Kubayan inucap nyepuhin raga.
 - (3) Pradé sinalihtunggil Pemangku lan Kubayan utawi makekalih kapialang cuntaka, kengin nyelang Pemangku tiosan utawi nuur sang Sulinggih.
 - (4) Semaliha yan sampun Pemangku lan Kubayan ngayah tigang rahina ring Pura, kancit wnten kulawargannia padem, Pemangku lan Kubayan inucap tan keneng cuntaka, saké wanten Pemangku lan Kubayan tan kawéhin budal selami Piodalan.
- ② Pariambek Sang Pemangku lan Kubayan patut madasar antuk kecaping sastra sané ngoneksila sesananing Pemangku lan Kubayan , luira: Kusumadewa, Sangkul Putih, Sesananing Kepemangkuan.
- ③ Pemangku lan Kubayan tan kelugra ^{nge-}nistayang déwék minakadi jangkak-jongkok ring margine, megecel, miwah pratingkahing dudu séwosan.
- ④ Ritatkala piodalan ring Pura, pradé kawentenang tabuh rah (tajan), Pemangku lan Kubayan tan kelugra nyarengin santukan Ida Batara kantun nyejer.
- ⑤ Pradé Pemangku lan Kubayan tan setinut ring pariambek kesulinggihan inucap ring ajeng, keni pamidanda kadulurin antuk pangaskara manut perarem.

Pawos 47.

1. Pikolih/petias Pemangku lan Kubayan.
 - (1) Pemangku polih pelaba.
 - (2) Kubayan polih palaba apiakan sakéng ngaryaning/ngarap.
 - (3) Luput pakaryan lan reramon, pedagingan keni sekadi patut.

Pawos 48.

- ① Pemangku lan Kubayan kegentosin seantukan :
 - (1) Seda.
 - (2) Sungkan banget pisan.
 - ③ Pinunas ngerage risampun putrané (sangkubayan) sami marabian.
 - (4) Kawusan antuk krama riantukan laksanannia lémpas ring sesama miwah dharmaning Kepemangkuan/Kubayan (Kesulinggihan).
- ② Pradé Pemangku lan Kubayan kawusang sangkaning melaksana asta dusta, keni pamidanda manut perarem saha ngewaliang pelaba druén Krama.

Pawos 49.

- ① Kasukertan lan kesucian Pura sakadi ring sor puniki :
 - 1) Sane ten kelugra ngeranjing ke Pura, luwira :
 - (1) Sang ketiba catur cuntaka, mekadi :
 - a. Sebel kandel ngeraja sewala selami durung mebersih.
 - b. Sebel santukan mederbe putera (anak alit), sane lanang (reramane sane lanang) selami 12 rahina, isterinyane selami tigang sasih.
 - c. Sebel pengantenan, selami durung kawentenan pabeyekalan tur naur bakatan ring Pura Puseh Gunung Pingit.
 - d. Sebel sangkaning wenten anak padem manut sengker.
 - (2) Makta sahanan barang sinanggeh ngeletehin.
 - (3) Sato agung, sajawaning rikala mapepadan.
 - (4) Mabusana tan nganutin tata caraning ngeranjing ke Pura.
 - 2) Sane kelugra ngeranjing ke Pura :
 - (1) Krama Banjar Adat Pengaji melusana sekadi caraning ngeranjing ke pura sane sampun ketah ring jagate.
 - (2) Tamiu kasudian pemerintah kangkat Mesania.
 - (3) Tamiu dura negara upami toris, welang babusane ngangge ambed.
 - (4) Sapesira ugi sedereng polih uwak-uwakan (pituduh) sakeng Prajurun Banjar Adat.
 - (5) Jatma petita pianak bebinjat, wong abot tan sinangaskara, wong memitra ngalang, jatma sakit ila, buduh, miwah cuntaka sewosan.
- ② Pretingkahe sane ten wenang ring Pura luwira :
 - (1) Mesumpah utawi mecoran, sejawaning pituduh Prajurun Banjar Adat.
 - (2) Mekobetan (mekoratan), mewarih. mesanggama, mekolem dados asiki lanang istri, nyangsang busana, matutan wastera, miwah sane sewos-sewosan.
 - (3) Memisuh miwah wicara sane ngeletehin manah utawi pikayun, miwah ngawetuang biapara/erang sang miragiang.
 - (4) Mejajal, megerengan, bilih-bilih jantos metu letah rah.
 - (5) Mungguh utawi tedun ring Pelinggih, sejawaning pituduh antuk Prajurun Banjar Adat.
- ③ Sang mamurug kecaping ring ajeng, keni pamidanda tur pamrayascita manut pararem.

Pawos 50.

1. Yening wenten anak kerawuhan ring Pura, kengin kapintonin, malarapan antuk kadagingan geni baan kawu bulu sepenginanagn suwenia ring pangkonnia, yan prade mekesiab, kesumangsayan tan yukti kerawuhan, wenang esisipan manut pararem.

- ② Prade ring Pura kehanan durmanggala, minakadi kabancaran, Pemangku lan Kubayan patut digelis nyadokang ring Bendesa Adat utawi Prajuru, mangda marumang Krama Banjar Adat tur ngawentenang pamrayascita.

Pawos 51.

1. Tata kramaning ritatkala piodalan memargi, sekadi ring sor puniki :
 - ① Sadurung katur Upacara Piodalan, Krama banjar tan kawenang ngaturang sembah (muspa).
 - ② Sajeroning ngaturang Pujawali minakadi Dewa Yadnya ring Pura tan kalugra ngangge tip lan kaset, sejawaning ritatkala ngawentenang ilen-ilen panglilacita tur mangde nyuarayang gending-gending Bali (gegambelan miwah kidung).
 - ③ Ilen-ilen Pujawali sane merupa tetamian duk nguni minakdi Gong, Rejang, Baris Tumbak, Pendet, Topeng Sidakarya, miwah sane sewosan, mangda ajeg kemargiang ritatkala ngaturang Pujawali manut dudonan.
 - ④ Ritatkala ngemargiang Pujawali mangda kawentenang Kidung Warga Sari olih Daha-Truna utawi Krama Banjar sane istri.
 - ⑤ Ritatkala ngemargiang pemuspan lan micang Banyun Cokor mangda kawentenang panglokika.

Pawos 52.

1. Indik wewangunan Pelinggih ring sajeroning Pura.
 - ① Wewangunan Pelinggih mangda keutsahang tan ngangge beton cetakan, miwah raab seng.
 - ② Sekancan wewangunan mangda nganutin Bebalian medasar antuk uger-uger Asta Kosala Kosali miwah Asta Bumi.

PALET 2

INDIK RESI YADNYA

Pawos 53.

1. Resi Yadnya utawi Brahma Yadnya, teges ipun Yadnya sane katur mantuka ring para/Rsi sane ngaloktahang Weda.
2. Sane kasingenggeh Rsi Ida sane nerima wahyu utawi ngawikanin indik Weda.
3. Pangaksanan Rsi Yadnya:
 - ① Ngemargiang Swadhyaya utawi melajah ngeraga indik Pustaka Suci Weda.

- (2) Mapitinget antuk upacara pariindik tedune Pustaka Suci Weda, luih ipun:
 - Pariodalan Sang Hayang Aji Saraswati.
 - Siwa Ratri, ngwacen daging Pustaka Suci Weda.
- (3) Ngaloctahang indik daging ajaran Pustaka Suci Weda.
- (4) Ngemargiang dana punia utawi daksina, mantuka ring para Pandita ritatkala pariodalan manut sekadi sane munggah ring Pustaka Suci Weda.

PALET 3 INDIK PITRA YADNYA

Pawos 54.

- ① Pemargin Pitra Yadnya madudonan sekadi ring sor puniki:
 - 1) Pengupakaran sang kelayu sekar (jadmasane padem utawi seda.
 - (1) Kapendem saha keupakaran manut dresta .
 - (2) Upakara atiwa-tiwa (pengabenan/pelebon).
- ② Upacara pitra yadnya ngawit keabenan, kelanturang antuk upacara nyekah.

Pawos 55.

Swadhraman lan tategenan rikala wenten sinalih tunggil Krama kelayu sekaran.

- ① Sang keduhkitan patut:
 - ① Nyadokang ring kelihan Banjar lan Bendesa Adat tur nunas tetimbang ring kawentenania.
 - (2) Ritatkala Krama Banjar ngerombo mekarya eteh-ete sang kelayu sekar tur ngateh ke setera, kedulurin payembrama antuk canang sesidan yasa.
- ② Swadharmaning Krama Banjar:
 - (1) Kelihan Banjar maritatas pemargin sang keduhitan napike pacang kependem ugi sang keleyu sekar.
 - (2) Prade kependem raris kawentenang swaran kulkul pamitahu antuk Kelihan Banjar utawi Petahjunia.
 - (3) Prade jagi lantur keabenan nganutin tata cara pengabenan sane keanggehang ring pungkur.
- ③ Penyanggran Krama Banjar selantur ipun:
 - (1) Sowang-sowang Krama nedunang patas manut perarem.
 - (2) Ngerombo ngaryaning eteh-ete sarwa kesarengin antuk sapasira mugl sane rauh nyaksiang sang keduhitan.
 - (3) Krama Banjar lanang istri nganter ke setera jantos papendeman puput.
- ④ Luih kelayu Sekaran:
 - (1) Padem ngadut manik (mobot). Sedereng kapendem maniknyane patut kamedalang riin sesampune mebasah

tur kapendem ring setera alit. Sang kelayu sekar dados kebakta budal tur kaupakara.

- (2) Padem salah pati, ngulah pati, kebengawan, dados kebakta budal tur kaupakara. Nanging ritatkala ngupakara, patut ngemargiang penebusan lan pengulapan ring genah ipun padem, ring catus pata (prempatan) muah ring cangkem setra.
- (3) Yening wenten sekadi kecape ring ajeng (angka 1) patut:
- Sang mederbe kependem mangda mekarya upacara melis ring peumahan.
 - Krama Desa mekarya upacara melis ring pura-pura.
 - Sadurung wusan upacara inucap krama desa tan dados ngeranjing ke pura-pura (sebel desa).
 - Wusan upacara melis, krama desa ngemargiang upacara ngerbu.
- (4) Yening odalan sampun ngaturang pejati, wenten kelayu sekaran karya memargi. sang kelayu sekaran patut makingsan ring setra, kemargiang antuk penumbak miwah pengapit, manut pangeloktika para juru.
- Tan katengerang antuk suaran kulkul.
 - Pemargin patus kelaksanayang rikala piodalan sampun puput.
 - Upacara pemendeman kemargiang wusan piodalan.
- (5) Tan kalugra nginepang bangbang miwah mendem rikala: rahina soma, wraspati, anggara kasih, purnama tilem, kala gotongan, semut sadulur muwah was nganten, sejawaning sang kelayu sekar keni gering ila (menular).

Pamos 56.

Indik kacuntaka sekadi ring sor puniki:

- (1) Cuntaka kelayu sekaran ring krama banjar pengaji:
- (1) Ikrama banjar selami 3 rahina sakeng pengurangan.
- (2) Sang madruwe kaduhkitan selami 42 rahina ngawit sesampune ngemargiang pemerascitan mapegat, yan prade sawa punika mapendem.
- (3) Yening sawane kaabenang, kacuntakania, sang madruwe kaduhkitan sebel selami 42 rahina, ngawit ngemargiang pamerascitan mapegat. Nanging yaning raris ngasti, wus nganyut tan keneg cuntaka.
- (2) Cuntaka pengabenan ngawit sakeng ngoreng jantos pengutangan.
- (3) Sane tan keneng cuntaka luih ipun:
- (1) Pemangku miwah kebayan.
- (2) Para sulinggih sane sampun madiksa.
- (3) Pemangku lan kubayan utawi sulinggih tan keneng cuntaka teges ipun sekadi ring sor:
- Pemangku miwah kebayan utawi sulinggih kangkat ka pura-pura utawi genah suci tiosan.
 - Pemangku lan kubayan utawi sulinggih tan kangkat kapaumahan sane maduwe kaduhkitan.

- Yening wenten ngaben nuur sang Rsi Pujangga, kangkat pemangku utawi kebayan makta tirta ke genah sang kaduhkitan kantos ring pamedal, wusan lud raris pemangku/kubayan nyepuh raga.

Pawos 57.

1. Luwiring atiwa-tiwa:

(1) Sawa Prateka

- Mageseng (makingsan ring geni)
- Mapendem (makingsan ring tanah)
- Meanginan (mekingsan ring angin)
- Masekeh (mekingsan ring paumahan)
- Marendem (mekingsan ring toya)

(2) Ati Wedana:

- Sawa wedana utawi nyuasta; ngeseng sawa kantos kaupakara.
- Asti wedana, ngeseng sane mewali sakeng bang-bang.
- Ngerca wedana utawi tirta prenawa.

(3) Atma Wedana:

- Ngeroras
- Mukur
- Maligia

(4) Nglungah :

2. Atiwa-tiwa sane kaloktah ring-kemargiang ring krama banjar pengaji inggih punika sawa prateka mabiya tanem.
3. Panemayan pengabenan (attwa-tiwa) wenten kalih pawos:
 - (1) Ngaben dadakan utawi bah bangun, kadadosang nanging tan kangkat ngerereh kesamping.
 - (2) Ngaben ngemasa kemargiang kirang langkung limang warsa; pekaryane karambo antuk krama banjar manut dresta, pedagingne sakeng sane madruwe sawa.
4. Nyuasta Geni: patus manut sekadi sang kelayu sekar.

Pawos 58.

1. Patus pengabenan luaripun:

(1) Sawa Prateka:

- Klabang akuub, tiying akatih, saang apesel, miwah jejaitan manut pangluktika prajuru.
- Pamedal patus manut perarem, sire cedok keni denda naker manut perarem, pamedal patus tetep kekenin.

(2) Nyuasta Geni: patus medal sekadi sang kelayu sekar:

2. Yening wenten sawa saking dura desa keabenang ring krama Adat Banjar Pengaji keni pamidanda manut perarem.
3. Yening wenten sawa keabenan kedura desa utawi banjar tiosan tan kangkat.
4. Yening wenten sampun mesadok, pacang ngaben utawi upacara tiosan wastu tan pekrama tur pekaryane sampun

ambile ring ikrama banjar, wenang keni pamidande manut perarem.

5. Yening wenten pemangku utawi kebayan seda, manut sang keduhitan.
6. Dudonan pengabenan, ngawit sakeng seda utawi ngeplugin (ngulapin) jantos pengiriman utawi nganyut.

PALET 4

INDIK MANUSA YADNYA

Pawos 59.

1. Manusa Yadnya teges ipun upacara-upacara dramaning manusa ngawit sakeng patemoning kama petak kelawan kama bang sajroning garba jantos mediksa.
2. Upacara ring ajeng medudonan sekadi ring sor:
 - (1) Sadurung anak alit medal (Praenatal)
 - Abyakala
 - Kepus odel
 - Roras rahina
 - Tutug kambuhan /42 rahina
 - Tigang sasih
 - Pawatuan/oton (6 sasih)
 - Tutug kelih (ngraja wedana ngebakin duwur)
 - Metatah/mepandes
 - Mewinten
 - Mewiwahan/merabian
 - Madiksa

Pawos 60.

1. Yening alaki rabi ngemedalang rare luh muani (kembar buncing) utawi kembar silih kasih patut ngemargiang:
 - (1) Ring banjar sesayut agung miwah mecaru ngangge ayam panca warna.

Pawos 61.

1. Yening wenten anak istri ngarbini (mobot) tur tan wenten anak ngangkenin mangda okane benjangan tan dados-kebaos anak alit babinjat, patut meme bapane ngaryaning upacara pawiwahan ngangge simbul, napike ngangge keris utawi sane patut lianan.
2. Sesampune anake alit emas raris inut warga meme bapannyane, biange wantah pengayoman warga manut upacara pamerascitan.
3. Indik warisan kapungkur, wantah ngewarisin druwen biange kewanten, tan patut ngewaris kapurusa; sejawaning wenten tetimbangan tiös.

Pawos 62.

1. Yening ngambil rabi tiros agama mangda nganutin tata cara sane sampun kawedar sakeng jawatan agama inggih punika:
 - (1) Mangda maka bukti (cihna) sang merabi nganutin agama sang ngambil sane kabawos "surat pernyataan" tur kesaksiang olih jawatan Agama kabupaten lan kecamatan.
 - (2) Ngemargiang upacara sudiwedani.
2. Sesampun ring ajeng tegap, wawu dados kaupacara.

PALET 5

INDIK BHUTA YADNYAPawos 63.

1. Bhuta Yadnya teges ipun upacara-upacara pabeakala ring pertiwi lan kayangan, sarwa prani saha upacara ring babhutan.
2. Upacara pebeyakala ring sarwa prani luwire:
 - (1) Ring sarwa tumuhun rikala tumpek Ngatag (rahina Saniscara Kliwon wariga)
 - (2) Ring sarwa ingon-ingon rikala Tumpek Kandang (rahina Saniscara Kliwon Uye)
 - (3) Upacara pakala-kalaan manusia manut wiguna, kebawos pabeyakala.
3. Upacara pabeyakala ring pertiwi, kahyangan lan bebhutan kawastanin mecaru.
4. Pecaruan ring ajeng wenten kabawos: nista, madya miwah utama, manut wigunan ipun mekadi ring sor puniki:
 - (1) Segehan (yadnya malit)
 - Segehan kepel
 - Segehan cacan
 - Segehan agung
 - (2) Gelar sanga (mangda ritatkala piodalan)
 - Gelar sanga alit
 - Gelar sanga agung
 - (3) Caru
 - Eka Sata
 - Panca Sata
 - Panca Kelud
 - Panca Resi Gana
 - Mewalik Sumpah
 - Labuh Gentuh
 - Tawur Agung
 - Panca Wali Krama
 - Eka Dasa Rudra
4. Beyakaon.
5. Sejabaning sane munggah ring ajeng taler kawentenang upacara :

- (1) Ngejot/mesaiban utawi Yadnya Sesa nyabran wusan ngrateng.
- (2) Mesapuh-sapuh rikala pacang ngawentenang wali ring pura.

Pamos 64.

1. Ngangken ngewarsa rikalaning tilem Kesanga kawentenang Tawur Kesanga, katahe kebawos Ngerupuk, makacihna pacang mapag rahina Panyepian (Mejaga-jaga)
2. Pemargi sejeroning Ngerupuk utawi tawur kesanga sekadi ring sor :
 - (1) Ring Bale Banjar kemargiang pecaruan meruntutan perang sata tigang saet raris pepranian, selantur ipun kemargiang pengerupukan.
 - (2) Ring suwang-suwang puri utawi pumahan kemargiang pengerupukan manut dresta, ring pamedal nancep sanggah cucuk saha yadnyania taler manut dresta;

SARGA VI
SUKERTA TATA PAWONGAN

PALET 1
INDIK PAWIWAHAN

Pamos 65.

1. Pawiwahan inggih punika patemon purusa predana, melarapan antuk penunggalan suka cita, kedulurin upasaksi sekala niskala.
2. Pidabdab sang pacang mewiwaha patut:
 - (1) Sampun munggah Daha-Truna.
 - (2) Nganutin Undang-Undang Perkawinan, kawentenania antuk Guru Wisesa.
 - (3) Sangkaning pada rena utawi tan kapaksa.
 - (4) Kawisudayang prade ngambile tios agama miwah kepati wangi.
 - (5) Nganutin kecap agama (tan gamia gemana, para dara, kulawarga sepinda).
- ③ Pawiwahan sane kepatutang (syah) ring Banjar Adat Pengaji, sekadi ring sor puniki:
 - (1) Sampun kemargiang pabyakala utawi pesakapan, maduluran antuk upasaksi skala niskala antuk pinandita pinaka sang muput.
 - (2) Ritatkala kemargiang upacara pabeyakala kesaksiang antuk Prajuru.
 - (3) Kedulurin antuk tatengeran suaran kulkul.
 - ✓(4) Ngaturang bakatan ring Pura Puseh Gunung Pingit.

4. Parilaksana pewiwahan sane sampun ketah ring Banjar Adat Pengaji, luwire:
 - (1) Pewiwahan antuk Pepadika, kemenggala antuk kulawarga sang memadik (mesuaka, mekruna).
 - (2) Pawiwahan antuk Nyeburin utawi kesentenang.

Pawos 66.

1. Tata cara pewiwahan antuk pepadikan kewentenania ring banjar Adat Pengaji sekadi ring sor puniki:
 - 1) Kakrunayang ping tiga, saha sowang-sowang melarapan antuk;
 - (1) Kaping ajeng antuk canang (pengerawos)
 - (2) Kaping kalih taler antuk canang pengerawos.
 - (3) Kaping tiga antuk pejati utawi daksina, makacihna upasaksi sekala niskala.
 - 2) Risampune pepadikan puniki katerima, anake isteri raris budal ke pekubon sang lanang kelanturang antuk pabeyakala saha upacara pewiwahan sepatutnyane.
 - 3) Mangde puput sepisan sekala niskala, raris kulawargan sang purusa makta pejati ring Merajan sang wadon saha jejauman.
2. Tata cara perabian antuk ngerorod manut sekadi ring sor puniki:
 - (1) Pemargin sang ngerorod kdasarini antuk suka rena marep lanang-wadon.
 - (2) Kawentenang duta pengelukuan sekirangnyane kalih diri.
 - (3) Kamenggala antuk geng pengampura arep ring pekulawargan sang wadon.
 - (4) Keadungan bawos indik pakedih utawi palegeyan arep ring pasewakan sang ngidih, saha dewasa pwidi-wedanannya riwekas.
 - (5) Kramane sane nampi wang ngerorod, patut pramangkin mesadok ring Kelihan Banjarnyane.
 - (6) I Kelihan patut digelis nureksa tur netes sang ngerorod, kabuatan merityaksayang manut utawi singsal pemargine ring dresta.
 - (7) Bilih pemargine sampun nepek ring dresta, sang ngerorod miwah sane nampi, polih pamikukuh pesayuban Kelihan banjar.
 - (8) Prade pemargine tan manut ring dresta, I Kelihan patut digelis malasang. Sang kinira-kira katetehan kewehin pesayuban ring jeron Kelihan.
 - (9) I Kelihan digelis patut ngutsahayang metahu wirang sang ketetehan pinika. Prade linggihnyane doh, dura Desa utawi Kecamatan, utsahayang katur ring sang rumawos (Perbekel/Camat) manut dudonan.

Pawos 67.

1. Sang maseserep sane pacang netes pangerorodan, patut mesadok tur nunas penuntun ring Kelihan Banjar. I

- Kelihan patut nureksa natasang seserep punika, jati tan jatinya patut pernah wirang sang ngerorod.
2. Yan linggihnyane jati-jati pernah wirang, I Kelihan patut digelis ngater seserep punika ke umah genah sang ngerorod.
 3. Sang meseserep patut tinut ring sapituduh kelihan nganinin tata netes pangerorodan, luire:
 - (1) Ngeranjing ke umah inucap tan langkung ring (kalih) diri;
 - (2) Tan kengin makta sanjata gegawatan sakeluire;
 - (3) Tan kengin matingkah kalih mebawos purusya nantang-nantang.
 4. Senepaka, I Kelihan patut midabdbabin mangda anake istri ngerangkat jati-jati polih nerangang idepnyane sebebass ipun. Wirang seserepe mangda polih mireng ucapan anake istri punika.
 5. Luwir pidabdabe makadi:
 - (1) Anake isteri kagenahang ngeraga, tan dados anak sewos ngenampekin prade kirang ring 3 (tigang) depa, tur tinas ring inange.
 - (2) I Kelihan nuntun, mangda sang meseserep polih metaken ring sang istri punika.
 - (3) I Kelihan nyumakutayang pamekas ring sang isteri, mungguing dane pacang ngicenin pesayuban manut ring daging idep sang isteri.
Yan pada arsa pangerorodane sang maseserep pacang katulak. yan sangkaning pemaksan, sang lanang pacang katiwakin pamidanda tur katundung.
 6. Pamupute, I Kelihan dumugi melaksana manut ring pamutus idep anake istri inucap.

Pawos 68.

1. Tata cara pewiwahan antuk nyeburin utawi kasentanayang, dudonanya manut sekadi pewiwahan antuk pepadikan ring ajeng.
2. Sang lanang sane kepadik antuk kulawargan anake isteri, dados mapawakan wadon.
3. Risampune pepadikan punika katerima, sang lanang keajak raris budal kepakubon sang wadon, kelanturang antuk pabeyakala saha upacara pewiwahan sepatutnyane.

Pawos 69.

1. Sinalih tunggil krama pacang ngewarangang kula warganya, patut masadok ring Bendes Adat Lan kelian banhar, sanistane tigang rahina sebanen dewasa ancer pewarangane.
2. Prajuru-Prajuru inucap patut maritetesin pewarangan punika. Prade pemargine sampun manut ring drestaning pewarangan, kaicen pesayuban sepatutnya. Prade ten manut, Prajuru-Prajurune ngutsahayang ngicenin penuntun larapan pemargine siddha manut tata cara.

3. Yan pewartangan inucap lempas ring kecap agama (upami gamia-gemana) sanesinanggih ngawanang terak jagat, Prajuru-Prajuru punika patut ngurungang pewargane tur malasang lanang wadon inucap.
4. Prade panureksan ring ajeng nyihnayang pewargane manutring drestane, upakarannya dados kalanturang.
5. Ring penemayan upakara widi-wedananya, Prajuru-prajuru inucap patut nodya maka saksi utama.
6. Prajuru-Prajuru saksi punika patut nitenin indik sulur pemargin pewartangane, bilih-bilih yaning wenten indik sane mabuat, upami bapaktan tatadan, jiwadanan sang pradana, sulur purusa-pradana lan salantur ipun.
7. Kelihan Banjar digelis nyuratang pewartan inucap ring ilikitannya saha nyiarang ring paruman Banjar kapungkur.

PALET 2
INDIK NYAPIAN LAN
BALU

Pawos 70.

Tata cara palas marabian:

1. Sang palas marabian, patut masadok ring Kelihan Banjarnya.
2. Pesadok ring ajeng kedulurin antuk keterangan pastika, nganinin sepaindikan palasnyane, upami indik pah-pahan guna kaya, tataning ngupajiwa okannya bobotan kalih sakaluwiring pamutus iketan alaki-rabi.
3. Palas parabiane sane patut kasadokan inucaping ajeng, inggih punika palase sane sampun pastika puput bawos, yadiastu sangkaning sami-sami lila legawa, utawi sangkaning pamutus pawicaran.
4. Prade sane kasadokang durung marupa kapalasang sane pastika puput, Kelihan Banjar patut ngicenin penuntun mangda sulur/bawos palase kepuputang rihin.
5. Palas merabian ring banjar Adat Pengaji wenten kalih pawos, inggih punika :
 - (1) Palas merabian sangkaning lila.
 - (2) Palas merabian sangkaning mawiwit wicara.

Pawos 71.

1. Tata cara palas merabian sangkaning pada lila, luwire:
 - (1) Nawur prabia pesaksi sinalih tunggil sami atenge.
 - (2) Polih pahan pada ring pagunakayannyane.
 - (3) Pabekel, tatadan sowang-sowang kakuasa niri-niri, miwah warisan kekuasa antuk sang purusa.
 - (4) Ngaweruhin miwah ngupa jiwa pertisentana manut seadharmaning guru rupaka.

- (5) Nawur pamidanda panebes kulkul manut parereman saha upakara manut dresta.
2. Tata cara palas merabian mawiwit wicara, luwire:
 - (1) Sang ayat palas marabian patut atur supekse pailikitan maring sang rumawos utawi Pengadilan Negeri wastu tinas apadang pamutusnya.
 - (2) Keni pamidanda panebes kulkul manut perareman.
 - (3) Ngaturang upasaksi ring Sanggah sowang-sowang saha upakara manut dresta. Sang wadon ngokasang mepamit ring Sanggah Sang Lanang, Sang Lanang ngokasang ngewaliang isterine ring Sanggah Sang wadon.
 - (4) Kadulurin antuk upakara mebaas kuning ring kayangan.
3. Kelihan Banjar ngunggahang ring pangikita saha nyiarang ring paruman kepalasan punika.

Pawos 72.

1. Sane kewastaninnyapian inggih punika, sinalih tunggil jadma sane palas merabian sangkaning pada lila utawi malilit wicara. Sang alaki rabi mekekalih kantung nyeneng ring pekubonnyane sowang-sowang.
2. Sane kawastanin kabaluan inggih punika, prade sinalih tunggil sang meperabian seda, lanang utawi wadon. Prade sane lanang seda, kewastanin balu luh, prade sane isteri seda kewastanin balu muani.

Pawos 73.

1. Ring banjar Adat Pengaji Krama sane sinanggih Balu kabinayang dados kalih pawos inggih punika :
 - (1) Balu luh wit sentana utawi sentana rajeg, miwah balu luh boya sentana.
 - (2) Balu muani kepurusa utawi wit sentana miwah balu muani boya sentana.
2. Swadharmaning balu boya sentana rajeg :
 - (1) Ngemangehang pati brata tan kengin ngemargiang paradara utawi dretikrama.
 - (2) Ngwasayang waris, pegunakaya; tan dados ngadol, ngadeyang, makidihang lan sane sewosan, sejawaning kebebasang saking pianak utawi kulawargannyane pinih nampek sakeng kurenannya prade pianaknyane kantung alit-alit.
 - (3) Kengin ngidih sentana pade wenten pidabdab sadurung sinalih tunggil padem.
 - (4) Kawenangan mewiwaha malih.
3. Balu boya sentana rajeg kaucap tan pageh, sekadi ring sor puniki :
 - (1) Drati krama utawi paradara.
 - (2) Metilar saking pakubonnya tan pasadok jantos tigang sasih.
 - (3) Lempas ring swadharmaning balu, tan praside ngesehin solah, maprewerdi arep ring pituduh kulawarga purusa.

4. Sang balu sane melaksane sekadi kecape ring arep puniki keni pamidanda manut parereman tur kewaliang mantuk ring kulawargannya.

PALET 3
INDIK SENTANA

Pawos 74.

1. Sentana wenten kalih pawos inggih punika:
 - (1) Pretisentana, sentana sane metu saking pawiwahan kepatut.
 - (2) Sentana peperasan, sentana sane poloh ngidih (keperas) kedulurin antuk upasaksi niskala.
2. Prade sinalih tunggil jadm wadon ngawetuang sentana antuk pewisehan sane tan kepatut, mangda sentana ipun tan kewastanin bebinjat utawi astran yogya kemenggala antuk penyangaskara.

Pawos 75.

1. Ngangkat sentana ring Banjar Adat Pengaji manut dudonan sekadi ring soe puniki:
 - (1) Sinalih tunggil krama yan pacang ngidih sentana, patut mesadok (35 hari) sebanen dewasa pemerasan.
 - (2) Kelihan inucap patut nyiarang ring Banjar, saha ngaturang ring Perbekel mangda kesiarang ring wewadengan Keperbekelan.
 - (3) Sang rumasa keberatan ring pemerasan punika mangda mesangke kalih minggu sebanen dewasa pemerasan, patut nunas bawos ring Kelihan Banjar.
 - (4) Kelihan Banjar digelis mawosin saha ngicen pidabdab lan pamutus bawos, tepekang ring sastra miwah drestane sewosan.

Pawos 76.

1. Yan sulur tata pemerasane sampun manut, Kelihan Banjar ngicen pesayuban, larapan upakara widhi-wedanane siddha kelaksanayang.
2. Ring penemaya upakarane Kelihan Banjar miwah Bendesa adat patut nodya sinangih saksi utama.
3. Sawusan upakara Kelihan banjar digelis nyuratang pemerasan inucap ring ilikitannya miwah nyiarang ring sangkepan banjar kapungkur.
4. Kala nyaksiang upakarane, pamepas kala ngunggahang ring ilikita, patut pastika wenten utawi tan wenten brana sakeluwirw sane sinaggeh pemerasan.

Pawos 77.

1. Prade sulur pamerasan tan manut ring drestane, Kelihan Banjare patut ngandeg sang pacang mekarya, saha ngicenin tuntunan mangda kapuputang rihin bebawos, sulur utawi wicaranya.
2. Pengelaksanane kapungkur anut ring pamutus inucap.

Pawos 78.

- ① Sane kapatut anggen sentana sekadi ring sor puniki :
 - (1) jadma sane maagama Hindu.
 - (2) Kaprenahang nedunang sakeng sang meras.
 - ✓(3) Kulawarga sakeng purusa, prade tan wenten kengin sakeng wadon.
 - ✓Yaning taler tan wenten wawu kengin sekama-kama wiadin saking kayun.
- ② Kengin ngangkat sentana^{ter} langkung ring adiri lanang wiadin wadon.

PALET 4

INDIK WARISANPawos 79.

- ① Warisan inggih punika tetamian arta berana saha ayah-ayahan ngupadi sukerta sekala niskala sakeng leluhurnya arep ring turunnya.
2. Kang sinanggeh warisan luwire :
 - (1) Duwe tengah mekadi tegal, ayahan desa, Khayangan, Pusaka, Siwa krana, lan sapanunggallannya.
 - (2) Pamrajan kemulan.
 - (3) Pagunakaya, tatadan utawi jiwa dana, utang piutang.
3. Wawu kengin kebawos waris prade wenten:
 - (1) Sang papeturun utawi pewaris.
 - (2) Keturunan utawi jati waris.
 - (3) Arta berana miwah tetepgenan utawi ayah-ayahan makacihna warisan.

Pawos 80.

1. Jati waris luwire :
 - (1) Pretisentana.
 - (2) Sentana rajeg.
 - (3) Sentana paperasan lanang utawi wadon.
2. Prade tan wenten sekadi ring ajeng kang sinanggeh jati waris:
 - (1) Turunan purusa pernah ngunggahang mekadi rerama misan lan mindon.

- (2) Turunan purusa pernah kesamping mekadi keponakan misan lan mindan.
3. Swadharmaning jati waris luwire:
 - (1) Nerima saha ngutsahayang tetamian pahan saking leluhurnya sekadi ngempon nyelediining ayah-ayahan pewaris.
 - (2) Ngabenang pewaris saha pangupakaraning pitra yadnya selanturnyane.
 - (3) Nawurin utang-utang pewaris sane manut pengloktika.

Pawos 81.

1. Pangepahan waris manut dudonan sekadi ring 'sor puniki:
 - 1) Risampun kelaksanayang pitra yadnya lan utang-utang pewaris puput ketawur.
 - 2) Para jati waris polih duman pada.
 - 3) Sinalih tunggil jati waris kengin tan polih paha pada:
 - ✓(1) Nilar kawitan lan sasaning agama.
 - ✓(2) Alpaka Guru Rupaka.
 - (3) Sentana rajeg kesah mewiwaha utawi pertisentana nyeburin sowang-sowang kebawos ninggal kedaton.
 - 4) Boya jati waris kengin muponin anut dudonan luwire:
 - (1) Sentana luh sedereng kesah mewiwaha utawi alpaka guru miwah prade maderbe pianak tan keangkenin antuk wong tua rare inucap, kengin ngewarisin wantah pikolih utawi pabunakayan sentana luh inucap kemawon.
 - (2) Balu luh wiadin balu muani nyeburin utawi sowang-sowang boyo sentana.
 - (3) Mulih daha utawi teruna riantukan ring pewiwahane pecak sampun kebawos ninggal kedaton.
 - (4) Pewaris kengin maweweh rikala maurip pinaka jiwadana utawi bekel, maka cihna paweweh tetep ring pianak sane kesah mawiwaha.

Pawos 82.

1. Prade sajeroning pakulawargan wenten jati waris langkungan ring adiri patut:
 - (1) Kawentenang paigum indik paduman (pahan) waris inucap.
 - (2) yan tan presida ketunasang tetimbang ring para Juru Banjat.
 - (3) Prade taler tan wenten cumpu ring tetimbang Prajurun Banjare kengin katumusang ring sang rumawos utawi Pengadilan Negeri.

2. Prade jantos karang paumahan kepah utawi kesepih antuk Pengadilan Negeri, patut sowang-sowang nedunin krama Ngarep.
3. Prade karang inucap kaputungan patut I Prajuru niwakin ring:
 - (1) Sang sinanggeh jati waris mekadi preti sentana utawi sentana peperasan.
 - (2) sang kengin anggen sentana manut kecaping ring arep.
 - (3) Prade taler tan cumpuring pidabdab Prajurun Banjare kengin katumusang ring sang rumawos utawi Pengadilan Negeri.

SARGA VII
WICARA LAN PAMIDANDA

PALET I

INDIK WICARA.

Pamos 83.

1. Sane wenag memawosin minakadi mutusang wicara ring Banjar Adat Pengaji luwire, Kelihan Banjar lan Bendesa Adat, anut antuk dudonan.
- ② Prade sang mawicara tan wenten cumpu ring tata cara Kelihan Banjar Adat lan Bendesa Adat mawosin minakadi ring pemutusannya, wenang nunas bawos bebandingan ring Perbekel utawi Camat.

Pamos 84.

1. Sehanaⁿⁱⁿ wicara sane mewiwit kecorahan sakaluwire, miwah sinanggeh nungkasin Awig-Awig, Pesuara miwah Peparaman Banjar, patut raris kebawosin tan nyantosang pesadok.
2. Sejaba wicara kadi ring ajeng, patut nyantosang pesadok sang nunas bawos.

Pamos 85.

1. Sehanaⁿⁱⁿ wicara patut ketepasin jantos iwang patutnya melarapan antuk : Tri Pramana minakadi bukti, saksi, miwah ilikita.
2. Pemutus patut tan marem nepek ring catur dresta (Sastra, Purwa, Loka miwah Desa Dresta)
3. Sehanaⁿⁱⁿ Pemutus patut tan marem ngupadi :
 - (1) Manda warga Banjare sayan pastika uning ring wewatesan iwang patute.
 - (2) Mangde sang kawon, tatas uning ring kaiwangan deweknya.
 - (3) Sang molih tan marem katuntun mangda sampun bas nginggilang kapatittanya, keputusanya, lila ngampura sang sisip.

(4) Nyapsap bibit-bibit pepinehe mamusuh-musuhan.

Pawos 86.

1. Kelihan Banjar utawi Bendesa Adat patut nunasang pemutus ring sang rumawos, prade wenten sinalih tunggil warga Banjare amandel ring pamutusnya, bilih-bilih yan punika Sinanggeh ngawanang duskertan jagat.
2. Sinalih tunggil warga Banjar keberatan ring pemutus Kelihan Utawi Bendesa, wenang nunas ring Guru Wisesa.

PALET 2

INDIK PAMIDANDA

Pawos 87.

1. Banjar Adat Pengaji wenang niwakan^o pamidanda ring warga Banjar sane sinanggeh sisip.
2. Tehiwak inucap kelaksanayang olih kelihan Banjar utawi Bendesa Adat lan penyanggannya manut dudonan.
3. Bacakan pamidanda sane wenten ring Banjar Adat Pengaji, luwire ;
 - (1) Ayahan panuku kesisipan.
 - (2) Danda arta <sepan, dedosan, tanjak taler, panikel>:
 - (3) Rerampangan:
 - (4) Upakara penyengaskara:
 - (5) Kanorayang/kawusan mekrama

Pawos 88.

1. Prade wenten pengantenan tan nganutin yusa, wenang keni pamidanda manut pepareman.
2. Yaning wenten sinalih tunggilkrama logika sanggraha, wenang keni pamidanda manut pepareman (sareng kalih), prade wenten sane memelit, keni sumpah. Prade durus keantenang wenang malih keni pamidanda manut pepareman.
3. Prade wenten anak makurenan palas ping kalih, nganten ping tigaring jatmane punika kewaten, pamidandanipun naur bakatan godel aukud ngeraga.
4. Prade wenten sinalih tunggil Prajuru ngawe wicara, keni pamidanda nikel tur keraryanan dados Prajuru.

Pawos 89.

1. Pamidandane sane ketiwakan patut manut ring Awig-Awig, Peswara, Pepareman utawi Dresta miwah Agama, miwah adung ring kesisipane.
2. Agung alit pamidandane sane katiwakang masor-singgihi manut kesisipanne.

PALET 3
INDIK RERAMPANGAN

Pawos 90.

1. Krama sane langkungan ring kalih sasih amandal negungin urunan miwah dedandan wenang kerampag.
2. Tata carane ngerampag patut tan mari kadi sor:
 - (1) Kelaksanayang olih Kelihan Banjar, kesarengin krama pinaka saksi sakehe 3 diri.
 - (2) Sang kerampag tan dados ngalangin sang ngerampag, saha tan sareng ngaksinin pemargin rerampagane.
 - (3) Sang ngerampag sangkaning darsana ngambil barang-barang rerampagan, akehne manut ring agung alit utang I Krama, utawi nyawenin tanem tuwuh (tetangunan) sane kerampag.
 - (4) Kelihan Banjar miteketang barang rerampagan gelis ketebes masengker 7 (pitung) rahine, Ring 8 (kutus) rahine pacang kalelang.

Pawos 91.

1. Rerampagan kasengkerin mangda sampunang jantos :
 - (1) Nganinin sawuwir barang sane patut inggilang manut agama miwah Dresta.
 - (2) Ngicalang cihne kemanusan sang kerampag.
 - (3) Mademang usaha pangupajiwa sang kerampag.
2. Jinah utawi raja-brana pamidanda miwah rerampagana ngeranjing dados druwen Banjar.

Pawos 92.

1. Pamidande sisip kecaping ring ajeng prasida purna buntas tintas apa-dang yan sang sisip sampun:
 - (1) Nunas geng sinampura ring krama Banjar, riantukan purun ngelong pasubaya tan manut ring Awig-Awig.
 - (2) Naur pamidanda pangelong swara, tur maweweh penyangaskara prayascita ring Pura Puseh Gunung Pingit.

SARGA VIII
NGUMAH-NGUMUHN AWIG-AWIG

Pawos 93.

1. Nguwak - nguwhin Awig-awig puniki kelaksanayang antuk Paruman Banjar.
2. Paruman inucap mangda kdasarlin antuk pekarsan Krama banjar.

3. Pemutus bawos medasar antuk paras-paros mewastu dados gilik seguluk.

Pawos 94.

1. Paruman indik nguwah-nguwuhin awig-awig sekadi ring ajeng kangin kamedalang antuk Kelihan Banjar utawi Bendesa, yadiastun niri-niri wiadin sinarengan manawita sangkaning palinderang jagat utawi panamaya.
2. Awig-awig puniki kasurat medasar antuk Awig-awig sane sampunketah kemargiang riya, sane keanggen titi pengancan olih Prajuru Banjar Adat Pengaji ngemargiang Desa Tata Cara.

SARGA IX
PAMUPUT

Pawos 95.

1. Awig-awig Banjar Adat Pengaji puniki puput kejurarem ring Pura Gunung Pingit, nemoning rahine Redite, Umanis, Maulu, Purnama Kapat lan Içaka 1911, tanggal 15 Oktober 1989.
2. Awig-awig puniki ngawit kemargiang ring sawengkon Banjar Adat Pengaji saking rahine Kejurarem inucap.
3. Awig-awig puniki kalingga tanganin antuk Kelihan Banjar lan Bendesa Adat, saha kesaksinin olih Kepala Desa Melingih Kelod.

LUIR SANG NGALINGGA TANGANIN